

Recuerdo di Eerste H.B.S. (Klas 8d) na Sint Dominicus College 1958-1959

Texto y potret cortesia di Ramon Todd Dandaré



Riba e potret cu nos ta mira aki, nos ta topa cu diferente persona masha conoci riba nos isla. Den añanan cincuenta e scolnan catolico di Aruba no tabata conoce ni scol mixto ni klas mixto. Tabata mucha homber na un scol un banda y mucha muhe na un scol otro banda, contrario na e scolnan protestant y scolnan di Gobierno cu tabata mixto, tambe den klas.

Un scol pa mucha homber masha conoci y respeta na Playa e tempo ey tabata Sint Dominicus College, cu tabata inclui scol primario (lagere school) y scol avansa (MULO). Sint Dominicus College tabata un asina yama 'scol di paga' catolico. Banda di e 'scol di paga' tabatin un asina yama 'scol di pornada' pa mucha homber den e mesun cura di Sint Dominicus College, yama La Salle School. Despues di zesde klas (cu tabata e ultimo klas di onderbouw), sea cu bo ta bini di 'scol di paga' of di 'scol di pornada', bo tabata drenta loka tabata yama bovenbouw, cu tabata e 4 klasnan di MULO, cu cual bo tabata termina bo 10 añanan di scol cu bo MULO-diploma.

Pero, banda di enseñansa di MULO, te na aña 1959 tanto Juliana School como Sint Dominicus College tabatin posibilidad tambe

pa sigui loka tabata yama H.B.S. (Hogere Burger-school), anto solamente te derde klas. Pa drenta HBS bo mester a bay zevende klas (e prome aña di MULO-bovenbouw) prome, loka ta nifica cu nos tabata haci un aña extra prome cu drenta 'middelbare school', manera tabata yama HBS (y Gymnasium), anto tabata haci un seleccion riguroso pa bo por a drenta H.B.S. Te e aña 1959 ey tambe, despues di derde klas di HBS e mucha hombernan (y tambe algun mucha muhe di Juliana School) tabata bay Hulanda pa sigui tanto nan HBS como despues nan enseñansa universitario of di hogeschool.

Na aña 1959 Colegio Arubano a cuminsa como scol di HBS den un barak den cura di Maria College cu seis (6) klas y seis lokaal: dos eerste, dos tweede y dos derde (parti den 3-A (comercial) y 3-B (matematico)). E aña ey mayoria di e mucha hombernan cu nos ta mira riba e potret a drenta Tweede H.B.S. na Colegio Arubano y nan a cuminsa bay un scol mixto, tanto pa loka tabata sexo, como pa loka tabata religion. Esaki ta nifica cu e potret cu nos ta mira aki, igual cu Colegio Arubano, e aña aki ta conta cu nada menos cu 55 aña cu el a wordo saca parti panort

di loka awendia ta La Salle College, dilanti di e porta cu boog cu te ainda ta existi.

Riba e potret nos ta mira di robes pa drechi y di ariba bin abou e siguiente personanan:

E rij di ariba: Edwin Saladin, Stanley Doedel, Eric Brown, Ivan Kelly, Richard Mercera (d.f.m.), Jacobo Petrocchi (d.f.m.), Roland del Prado, Bert Heemskerck y Johnny Chemaly.

E rij dilanti di nan: cuminando cu Frere Stanislas, Chesley Peterson (d.f.m.), Denis Henriquez, Ciro Geerman y mas na banda drechi Johannes Arrindell.

E rij meimey: Mathias Thiel, Henky Goedhoop, Nigel Matthew, Isnardo Farro, Eddy Lim-A-Po y net su dilanti Clovis Koolman, Arie Swaen, Emile de Cuba, Stanley Arends y John Benita.

E rij mas abou: 'Cables' Franken, Holger Mühlenbeck, Ramon Todd Dandaré, Ricardo Arends, Siegfried Tecla, Charlie Ibarra, Lancelot Lewis y Chin Curiel. No ta aparece: Randy Habibe.

Esnan cu mi a pone 'di feliz memoria' ta cu mi sa cu nan a fayece; mi no tin conocimiento cu ningun otro di mi compañeronan akiriba a fayece, si esey ta e caso, mi ta pidi mi disculpa.

Ramon Todd Dandaré